



Vuk'uzenzele

Uyetfulelwa Tekuchumana Tahulumende Nekuniketa Lwati (GCIS)

Siswati/English

Mabasa 2016 Lushicilelo 1



**Tigidzigidzi
leti-R7 tabelwe
taksiwonchanti
tetikhumulo**

Likhasi 7



**I-Diepsloot
itfola sitheshi
semaphoyisa
lesisha**

Likhasi 14

**INETIKHANGISO
TEMISEBENTI**

Yenta livi lakho livakale

Ongezwa Manyathi

Bahlali baseNingizimu Afrika labalungele kuvota batawuphindze batfole litfuba lelilungelo lemtsetfosisekelo ngekutsi bente luphawu ebhokisini lekuvota eLukhetfweni lwaboHulumende basemaKhaya lolutako lwanga-2016.

Ngekuvota kwabo, bahlali baseNingizimu Afrika abacinisi kuphela intsandvo yelinyenti yalalive, kepha baphindze babe bahlali labakhutsele ngekukhetha baholi babo lababatsandzako labatabasita ekwenteni ncono lizinga lemphilo yabo.

Loluphawu lwa-X lolubalulekile ephepheni lekuvota ludlala indzima ekwenteni likhansela libe nekutiphendvulela nasekucinisekiseni kutsi bomasipala babuyela kusicalonchanti ngekwetfula tinsita.

Kute umbuso wentsandvo yelinyenti welive lakitsi uhlale ucinile, bahlali baseNingizimu Afrika kumele babambe lichaza eLukhetfweni lwaboHulumende basemaKhaya lwanga-2016.

Kuba nelitfuba lekuvota kusho kutsi bahlali baseNingizimu Afrika benta livi labo livakale. Kepha loku ngete kwenteka nangabe bantfu bangacinisekisi kutsi emagama abo akhona eluhlweni lwebavoti ngembi kwekutsi luvalwe.

Bavoti labafanele kuvota kuphela lokumele babhalise kanye, ngaphandle uma befike kamuva nje nome nangabe kuntjintje iminyele yetigodzi tabo tekuvotela. Loku kubalulekile ngobe linyenti lebantfu baseNingizimu Afrika alati kutsi emawadi abo antjintjile kamuva nje.

Enkhulumeni yakhe Yebunjalo Belive, Mengameli Jacob Zuma ucele bonkhe bavoti lababahlali baseNingizimu Afrika kutsi babhalisele kuvota.

“Ngitsandza kubita bonkhe bahlali labafanele kuvota kutsi baphume ngelutsi lwabo baye etigodzini nasetiteshini tekubhalisela kuvota bayewubhalisa nome balungise imininingwane yabo, kute balungele loluhlelo lembuso wentsandvo yelinyenti lolubaluleke nakangaka,” ushito njalo.

Makhulu etinkhulungwane tebantfu baseNingizimu Afrika tisabele kulolubito ngeliviki lekucala lekubhalisela kuvota ngeNdlovulenkulu. Likhomishini Lelukhetfo Lelitimele (i-IEC) nyalo selimemetele kutsi liviki lekugcina lekubhalisela kuvota litakuba mhlaka- 9-10 kuMabasa 2016.

Bangetulu kwetigidzi letintsatfu bahlali baseNingizimu Afrika labavakashele titheshi tabo kuyewubhalisela kuvota, kubhalisa kabusha nome kulungisa imininingwane yabo. Sihlalo weLikhomishini Lelukhetfo, uMnu. Glen Mashinini, utsite linani lebvoti labavakashele titheshi tekubhalisela kuvota libe ngetulu ngalokuphindvwe kabili evikini lekucala lekubhalisela kuvota nakucatsaniswa neLukhetfo Lwabomasipala lwanga-2011.

Loku kusho kwenyuka ngema-23% ekubhaliseni nakucatsaniswa neliviki lekucala lekubhalisela kuvota eLukhetfweni Lwavelonkhe neLwetifundza lwanga-2014.

“Loku kusho lokuhle kuloluKhetfo lwaboMasipala lolutako lwanga-2016 nangesikhatsi lesitako,” kushito Mashinini.

Nanobe nje liviki lekucala lekubhalisela kuvota selindlulile, sisekhona sikhatsi sekubhalisela kuvota. Labakulungele kuvota, labasengakabhalisi nome labadzinga kuhlola imininingwane yabo, bangabhalisela kuvota ngetikhatsi temsebenti emahhovisi eliKhomishini Lelukhetfo langakubo nome babhalisele kuvota emalangenini ekubhalisela kuvota lakhetsekile.

Labo labafuna kubhalisela kuvota emahhovisi eliKomishini yeLukhetfo kumele bashaye lucingo ngaphambilini kute bente lipoyinti. Loku kubangwa ngukutsi nase kusondzele Lusuku

> Iyachubeka elikhasini lesi-2

**Hulumende
wasemakhaya
usetandleni
takho!**

**Bhalisela
kuvota!**

9-10 Mabasa 2016

REPUBLIC OF SOUTH AFRICA

HULUMENDE WASEKHAYA

LABASIKATI LABACHUBA UMKLAMO WEKWAKHIWA KWETINDLU BAKHA TINDLU LETIHLONIPHEKILE

Rirhandzu Nkombyani

Bahlali labahlala etindzaweni letingephasi kwaMasipala iMogalakwena madvute nje batawutfolela tindlu letihloniphekile. Linani lonkhe lemindeni le-60 yaseGa-Hlako naseTaueatsoala ngephasi kwaMasipala iMogalakwena, Masipala Wesigodzi iWaterberg itawuhlomula Emkhankhasweni weLitiko Letekuhlaliswa Kwebantfu lwamnyaka wonkhe Lekwakhelwa Kwalabasikati. Umkhankhaso Wekwakhela Labasikati nguMklamo we-Letsema lohlose kwakhela bantfu labaphuye kakhulu tindlu, labanjengalaba: bantfu labadzala, labasikati, labaphila nekukhubateka kanye nebantfwana. Umklamo welubanjiswano weLitiko Letekuhlaliswa Kwebantfu, Labasikati baseNingizimu Afrika Labasemkhakheni Wekwakha kanye nemkhakha walabatsintsekako wentiwa njalo ngemnyaka esifundzeni sinye nome ngetulu ngenhloso yekugubha Inyanga Yabomake. Umkhankhaso Wekwakhela Labasikati wasungulwa nga-2006 kantsi sewakhe tindlu leticishe tibe nge-500 eveni lonkhe kusukela wasungulwa. Likhuluma emcimbini wekubekwa kwesitini nekuphendvulwa kwemhlabatsi lobewubanjelwe eTaueatsoala, Lisekelandvuna Letekuhlaliswa Kwebantfu litsite lomklamo uveta kutsi hulumende kuto tonkhe tinhlaka letintsatfu, utimisele kuniketela ngetindlu letikahle kubahlali baseNingizimu Afrika. “Lokubaluleke kakhulu mayelana nekwakha ngukutsi kunebudlelwane lobubonakalako emkhatsini wahulumende, umkhakha wangasese kanye nebantfu labanikele kakhulu ngemtamo nangesikhatsi kucinisekisa impumelelo yalomklamo,” lishito njalo Lisekelandvuna Kota-Fredericks. Lisekelandvuna Kota-Fredericks litsite bayati kutsi indzawo iTaueatsoala lengephasi kwaMasipala ihlangabetana netinsayeya. Licinisekise ummango kutsi letinsayeya kubukanwa nato nekutsi hulumende usebenta kamatima kutfolela sisombululo. “Ngiyajabula kuva kutsi tindzawo letinyenti

letisondzelene neTaueatsoala tinagezi nekutsi labanye bantfu labasitwa nguhulumende bahlangene ndzawonye bakha tinhlango letitawukhucita emacandza, emaphepha lasetjentiswa emithoyi, emathawula alabasikati ekuya esikhatsini kanye naleminyane imikhucito. Umphatsiswatiko (i-MEC) Wetekubusa Ngekubambisana, Kuhlaliswa Kwebantfu Netendzabuko eLimpopo, Makoma Makhurupetje utsite litiko litibophelele ekucinisekiseni kutsi labasikati bayahlonyiswa kantsi loku kubonakele emiklameni yetindlu leniketwe tinkampani tekwakha tabomake kusukela nga-1994. “Kulomnyakamabhuku lowengcile kanye nalosetulu, iLimpopo inikelele ngemklamo yekwakha tindlu leti-5 900 etinkampanini tekwakha talabasikati lefinyelela emalini le-R507 123 551. Kutibophelela kwetfu kuvetwa ngelinani lematfuba etindlu lesiwasungulele imimango. Ematfuba langetulu kwetigidzi leti-3.3 asungulwe ngeluhlelo lwekwakha tindlu loluchaswe nguhulumende,” kushito MEC Makhurupetje.

KWAKHA TINDLU LETIHLONIPHEKILE Lomunye lohlomulile watfolela indlu ngaloluhlelo nguJoyce Ramashala (loneminyaka lenge-58) lovela eGa-Hlako ngephasi kwaMasipala iMogalakwena. Imphilo beyimatima kakhulu kuRamashala nemndeni wakhe lebahlala iminyaka leminyenti emkhukhwini lonemakamelo lamabili. Sikhatsi sekuna kwelitulu besimatima kakhulu emndenini. Ngesikhatsi Lisekelandvuna Kota-Fredericks kanye neMphatsiswatiko Makhurupetje bavakashele likhaya lakhe wehluleka kufihla injabulo yakhe. “Ngiswele emavi. Ngijabulile kutsi sitakuba nendzawo lebitwa likhaya. Likhaya litawubuyisa sitfunti setfu,” ushito njalo. Lomunye lohlomulile nguCatherine Moreana (loneminyaka lenge-70) lohlala endlini lenemakamelo lamabili nalabo labondliwa nguye labasikhombisa. Umklamo wekwakha tindlu ugucule imphilo yakhe naleyo yemndeni wakhe. **Rirhandzu Nkombyani usebentela Hulumende Wesifundza saseLimpopo*



Indlu lenzala.



Ndvunankhulu waseLimpopo Stanley Mathabatha ubeka sitini ngesikhatsi kwakhiwa likhaya lelisha laNkst Marutha.



Indlu lensha

Takhamuti Tasendzaweni yaseGa-Hlako naseTaueatsoala eLimpopo tiniketwe tindlu letihloniphekile tekuhlala nemindeni yato.

> Ichubeka isukela elikhasini-1 leku-1

IweluKhetfo kulelive linyenti letisebenti telukhetfo alibi khona emahhovisi, lisuke liyewufundzisa bantfu ngekuvota emimangweni.

LUSHA KUMELE LUBHALISELE KUVOTA

Njengoba lelive libungata iminyaka le-40 yekucubuka kwetibhelu eSoweto nga-1976, kufanelekile kutsi lusha luphume ngebunyenti balo luyewubhalisela kuvota kute lutewukwati kuvota lube nelivi esikhatsini lesitako. Situkulwane sanyalo sebantfu labasha kumele sikhutsatwe lusha lwanga-1976 sihambe embili ekuvikeleni likusasa lalelive. Bantfu labanyenti balahlekelwa timphilo tabo kute bonkhe bantfu baseNingizimu Afrika bahlale eveni lelikhululekile nalelinentsandvo yelinyenti. Nanobe nje intsandvo yelinyenti ilingwa njalo nje, loko akusho kutsi akukho inchubekelembili leseyentiwe kusukela nga-1994.



LELINYE LITFUBA LEKUBHALISELA KUVOTA

Ungalahlekelwa litfuba leliviki lesibili le-kubhalisela kuvota eluKhetfweni Lwabo-masipala lwanga-2016. Titeshi teku bhalisela kuvota titawuvulwa kuvelonkhe kusukela ngensimbi ye-8 kusasa kuya ensimbini ye-5 ntsambama mhlaka-9 na-10 kuMabasa 2016.

NGUBANI LONGABHALISELA KUVOTA?

Kute ubhalisele kuvota kumele ube ngumhlali waseNingizimu Afrika;

lokungenani ube neminyaka yebudzala le-16 (ungakwati kuvota kuphela kusukela eminyakeni yebudzala le-18); ube namatishi loluhlata lonebhakhodi, likhadi-matishi; nome sitifiketi samatishi wesikhashana (i-TIC). Bafakiticele kumele banikete emakheli alapho bahlala khona lokuyindzawo lengaphasi kwesigodzi salapho babhalisela khona kuvota. Uma ngabe bavoti banganalo likheli lelisemtsetfweni kumele banikete tisebenti telukhetfo imininingwane leyenele yendzawo lebahlala kuyo kute bacinisekise kutsi babhalisa esigodzini sekuvota lesifanele.

NGIKUBHALISELA NINI FUTSI KUPHI KUVOTA?

Ungenta lipoyinti lokuyewubhalisela kuvota ngetikhatsi temsebenti ehhovisi leliKhomishani Lelukhetfo langakini lelibukene nesigodzi selukhetfo sangakini.

KUMELE NGIKUBHALISELE KABUSHA NINI KUVOTA?

Kumele ubhalisele kabusha kuvota uma:

- likheli lasekhaya lakho lintjintjile
- uma emafomu e-IEC akutjela kutsi iminyele yesigodzi sakho sekuvota intjintjile.

WATI KANJANI KUTSI UBHALISILE NOME KUTSI UBHALISELE KUPHI KUVOTA?

Kuhlala imininingwane yakho kubhalisela kuvota, ungenta loku:

- tfumela i-SMS nenombolo yakho yamatishi ku-32810 (i-SMS ngayinye ibita R1.00)
- hlola imininingwane yekubhalisela kuvota yakho kungcondvomshini ku: www.elections.org.za
- hlola sitheshi sakho sekuvota ngeliviki

lekubhalisela kuvota (9-10 Mabasa 2016)

- hlola ehhovisi langakini le-IEC ngetikhatsi temsebenti.

KUFAKA SICELO SELIVOTI LELIKHETSEKILE

Livoti lelikhetsekile livumela umvoti lowehlulekako kufinyelela esiteshini sekuvota ngeLusuku Lwekuvota kutsi afake sicelo sekuvota ngelusuku lolubekiwe ngembi kweLusuku Lwelukhetfo. Akusiye wonkhe umuntfu lokulungele kuvota lokukhetsekile. Labo labafisa kubhalisela kuvota kumele babe naloku lokulandzelako:

- babe ngulababhalisele kuvota
- babe namatishi loluhlata lonebhakhodi, likhadi-matishi; nome i-TIC (faka sicelo eHhovisi Letasekhaya)
- bahlangabetane nemigomo yeluhlobo lolutsite lwelukhetfo.

Ungafaka sicelo selivoti lelikhetsekile uma ngabe ungakwati kuya esiteshini sakho sekuvota ngobe ungakaphili kahle emtimbeni, unekukhubateka nome utetfwele; nome uma ungakwati kuvota esiteshini sakho sekuvota ngeLilanga Lwelukhetfo. **.NGIVOTA NINI?**

Cindzetela “Like” kulikhasi le-Facebook Lekhomishini Yelukhetfo Lelitimele (IEC-SouthAfrica) noma ulandzele i-IEC ku-Twitter (@IEC-SouthAfrica) kute utfole lwati lwakamuva mayelana neti-nsuku lokutawubanjwa ngato impheasantfo yeku-bhalisela kuvota

Ngekwemtsetfo, emavoti lakhetsekile angafakwa kuphela ngelusuku nome ngetinsuku letibekiwe eluhlweni lwekuvota kantsi akukho kubonelelwa lokutakwentiwa.

Kute utfole leminyane imininingwane shayela i-IEC: ku-0800 11 8000 nangabe une-mibuto mayelana nelukhetfo. Sikhungo setekuchumana sivulwa ngeMsombuluko kuya kuLesihlanu, kusukela ngensimbi ye-7 ekuseni kuya ensimbini ye-9 ebusuku.

TIGIDZI TIVAKASHELA TITESHI TEKUBHALISELA KUVOTA **Priscilla Khumalo**

Bangetulu kwetigidzi letintsatfu banfu labafanele kuvota labavakashele titeshi tekubhalisela kuvota kulo lonkhe lelive ngeliviki lekucala lekubhalisela kuvota kamuva nje. Kubantfu laba-3 097 194 labavakashele titeshi tekubhalisela kuvota, laba-692 730 bebabhalisa kwekucala, kantsi laba-1 086 958 bebabhalisa kabusha etigodzini letehlukene tekubhalisela kuvota kantsi laba-1 317 506 bebacinisekisa baphindze balungise imininingwane yabo kuto tigidzi labavotela kuto. Kube nekusabela lokukhulu kubantfu labasha, kwaba nebantfu labasha laba-544 552 labangephasi kweminyaka yebudzala le-30 lababhalisele kuvota kwekucala ngca. Cishe ema-54% ebantfu lababhalisele kuvota kwekucala ngulabasikati. Loku kubonakele kuba yintfo levamile kuto tonkhe tifundza, ngaphandle kwaseNshonalanga Kapa, lapho cishe bekunekulingana emkhatsini walabadvuna nalabasikati ekubhaliseni kwekucala ngca. IKwaZulu-Natal neGauteng ibe cishe nahhafu walababhalise kwekucala,-24% walababhalisa kwekucala KwaZulu-Natal kwatsi 22.5% base-Gauteng.

**Mtfombo: Khomishini Yelukhetfo Letimele.*

Bhalisela kuvota!



Hulumende wasemakhaya usetandleni takho!

9-10 Mabasa 2016



REPUBLIC OF SOUTH AFRICA

TEKUPHEPHA NEKUVIKELEKA

I-Diepsloot itfola siteshi semaphoyisa lesisha

Noluthando Mkhize na-Edwin Tshivhidzo

Siteshi Semaphoyisa sase-Diepsloot, lokuyinzawo lengasenyakatfo neJozi lebesilindvwe sikhatsi lesidze, sigcine sivuliwe kantsi silindzeleke kutsi silwe nebugebengu kulendzawo.

Lesiteshi sivulwe ngalokusemtsetfweni yiNdvuna Yemaphoyisa Nkosinathi Nhleko, lebite ummango kutsi uvikele labasikati nebantfwana uphindze usebentise tinhlaka temaphoyisa temmango kulwa nebugebengu etindzaweni tawo.

“Intfutuko ita nangabe kunekuthula... Kuphindze kube semahlombe emmango kucinisekisa kuphepha kwawo. Sonkhe kumele sihlanganyele ekulweni nebugebengu,” ishito njalo indvuna.

INdvuna iphindze yaniketela ngetimoto letinsha letingetulu kwema-21 esiteshini kute tisite ekuciniseni kulwa nebugebengu endzaweni.

Hulumende usebentise imali lengetulu kwetigidzi leti-R100 ekwakheni lesiteshi semaphoyisa, lesacala kwakhiwa nga-2008.

Lekontileka yakhe ematfuba emisebenti lengema-145 kumalunga emmango labekacashwe njengetisebenti letingakacece-shwa kantsi nelusha lolungema-200 lwacece-shwa emikhakheni yekwakha lehlukene kusetjentiswa Luhlelo Lolwandzisiwe Lwemisebenti Yemphakatsi kanye Netinhlelo Tavelonkhe Telusha.

KUVIKELA BANTFU BASE-DIEPSLOOT

Ekwetfulweni kwesiteshi Libamba laKho mishane Wavelonkhe Wemaphoyisa Lieutenant-General Johannes Phahlane, litsite siteshi semaphoyisa lesisebenta kahle sibalulekile kuwo wonkhe ummango.

“NjengeLuphiko leMbutfo Wemaphoyisa aseNingizimu Afrika (i-SAPS), sijabule kakhulu ngekutsi lesiteshi sakhelwe nine, kute sihlonyiswe sitewukwati kusebentela siphindze sivikele bantfu baseDiepsloot ngalokuphumelelisako nangempumelelo. “Tonkhe tinsita letifakwe lapha kulesiteshi semaphoyisa titawusetjentiswa ngalokufanele na ngalokuphelele kute kuliwe nebugebengu,” ushito njalo. Lieutenant-General Phahlane wengete ngekutsi emaphoyisa atiphendvulela kubantfu

labasebentelako. Ukhulume ngekubaluleka kwebudlelwane lobucinile emkhatsini we maphoyisa kanye nemmango.

Utsite iNingizimu Afrika ihehe bantfu bato tonkhe tinhlalo labatseleke eJozi ngenhloso yekutfolela imphilo lencono.

“Bantfu labavela kuletinye tifundza kanye nalabavela emaveni labomakhelwane beta eJozi, kandvonga tiyadvuma, leyinkhaba yemnotfo wase-Afrika.”

“I-Diepsloot, njengemimango leminyenti lebomakhelwane, iminyene kantsi labanye bantfu bagcina benta bugebengu labanye basebentise kabi tjwala netidzakamiva, lokutintfo letivame kufaniswa nekubulala, kwetama kubulala, kushaya kanye neku-gagadla. Angicizelele kutsi sitawucinisa sandla ekulweni naletintfo.”

Utsite kubalulekile kucedza bugebengu, bashushumbisi betidzakamiva, inkhohlakalo kanye netigebengu.

“Sibukene futsi sisetawuchubeka nekubukana nemalunga etfu lasebentisa timbeji tetfu letihloniphekile kwenta tintfo letiphambene naloko lesisebentela kona. Sibita ummango wakitsi kutsi ubike nome ngukuphi ku ngatiphatsi kahle.”

Jonathan Satheke umhlali waseDiepsloot loweta watotibonela kuvulwa ngalokusemtsetfweni kwesiteshi semaphoyisa, utjele i-Vuk'uzenzele kutsi utiva aphephile ngeku-photfulwa kwalesiteshi semaphoyisa.

“Siyabonga ngesiteshi semaphoyisa lesisha ngoba silapha edvutane natsi kantsi loko kutawetfusa tigebebu,” ushito njalo.

KWETFULWA KWETINSITA LOKUBEKWA PHAMBILI

Kusukela nga-2014, i-SAPS beyisolomane isemkhankhasweni wekuvuselela nekuhlela kabusha titeshi temaphoyisa kusetjentiswa luhlelo Lwekwetfulwa Kwetinsita Lokubekwa Phambili (i-FSD).

“I-FSD yetfulwa nguhulumende kantsi ichutjwa Lihhovisi laMengameli ngenhloso yekucinisekisa kutsi sihlonipha imigomo ye-Batho Pele yekubeka bantfu phambili. Ngekuya kwayo, asikenti ncono kubukeka nekusebenta kwetikhungo tetfu kuphela, kepha siphindze sacece-shwa emalunga etfu kutsi angakwenta kanjani ncono kutiphatsa kwawo nawabukene nebantfu labavakashele nome labashayela etiteshini tetfu temaphoyisa,”



INdvuna Yetamaphoyisa Nkosinathi Nhleko (etulu emkhatsini) kanye Nelibamba laKhomishane Wavelonkhe Wemaphoyisa Lieutenant-General Johannes Phahlane bavule ngalokusemtsetfweni Siteshi Semaphoyisa saseDiepsloot.



kushito Lieutenant-General Phahlane.

Wengete ngekutsi loluhlelo luchutjwa kute kuhlangukane kutiphatsa ngalokufanele embutfweni wemaphoyisa.

“Siwubonile umehluko. Sente inchubekelembili etiteshini te-FSD lesesivele sitakhe kabusha nome lesitivulile. Sibonile kufinyelela kwemmango kuto, kwemukelwa kwawo etinhlelweni letetfulwa ngemaphoyisa, kusungulwa kwebudlelwane kwalabatsintsekako kanye nekucinisa budlelwane bemmango.”

Ngekuya kwaKhomishani Wavelonkhe

Wemaphoyisa, emalunga e-SAPS latawube asebentela ummango atawuhlanyela kutiphatsa, kusebenta ngalokufanele kanye nenhlonipho.

“Bugebengu kumele buphele, kantsi, ngeku-bambisana kumele sente imigwaco ibuyele ibe yetfu kute sitewukwati kukhulisa bantfwana betfu, lababholi bakusasa, eDiepsloot lephephile nalencono.”

INdvuna Yemisebenti Yesive Thulas Nxesi, nayo lebeyikhona ekuvulweni kwesiteshi, icele ummango kutsi usebentise kahle tikhungo tesive njengoba tisebentela wona.

Kulwa nebugebengu kanye nenkhohlakalo

Dorris Simpson

Mengameli Jacob Zuma umemetele tinhlelo tekwandzisa imitamoyekulwa nebugebengu kanye nenkhohlakalo.

Emphendvulweni yakhe yenkhulumophikiswano mayelana Nenkhulumo Yebunjalo Belive, Mengameli utsite hulumende ucinisa luhlaka lwemtsetfo kantsi futsi uyachubeka naletinye tindlela tekucedza bugebengu kanye nenkhohlakalo.

“Luphiko Loludla Imphahla (i-AFU) lwente umsebenti lomnyenti lomuhle kulo mnyakamabhuku lowengcile,” ushito njalo.

Loluphiko luphotfule emacala lange-463 ekudliwa kwemphahla lebita tigidzigidzi leti-R2 kantsi futsi luphotfule imiyalo le-342 yekubamba imphahla lebita tigidzigidzi leti-R2.8.

“Samba sesisonkhe lesitigidzigidzi leti-R1.6 sabuyiselwa kubahlukunyetwa bebugebengu,” kushito Mengameli Zuma. Lemali ya tfolakala ngemuva kwemisebenti yekuphenya ngenkhohlakalo.

Mengameli wengete ngekutsi tigidzi leti-R11 tatfolakala emacaleni lapho tisebenti tahlumende betitsintseka khona enkhohlakalweni nakulamanye emacala lahambisana nabo.

Utsite Umtsetfosivivinywa Wekudzalula Lokuvikelekile Lochitjiyelwe wetfulwa kuLibandla Lavelonkhe ngasekupheleni



Hulumende utimisele kulwa nebugebengu kanye nenkhohlakalo kulelive.

kwemnyaka lowengcile.

“Inhloso yawo lenkhulu kuvikela lababika ngenkhohlakalo kute sikwati kulwa nayo kancono nangalokuphumelelisako.

“Umtsetfosivivinywa Wekuvimbela Nekucedza Tento Tenkhohlakalo Lochitjiyelwe nawo wetfulwa ePhalamende,” ushito

njalo Mengameli Zuma.

Lomtsetfosivivinywa wenta ncono kusetjentiswa kweMtsetfo Wekuvimbela Nekucedza Tento Tenkhohlakalo kute kubukanwe netinsayeya letibonakalako kuphindze kuncishiswe ligebe.

Lomunye umtsetfo lomusha lotakwetfulwa

nguMtsetfosivivinywa Webugebengu Babongcondvomshini Nalokuhambisana Nabo, lokumele wetfulwe ePhalamende esigamini sekucala sanga-2016.

Bugebengu babongcondvomshini bu ngachazwa njengebugebengu lobentiwa kusetjentiswa bongcondvomshini kanye neninthanethi.

LUSHINTJO EMBUTFWENI WEMAPHOYISA ASENINGIZIMU AFRIKA

Sisekulo ludzaba lwetekuvikeleka, Mengameli umemetele tintfo letimbili letitawuntjintja kuLuphiko leMbutfo Wemaphoyisa aseNingizimu Afrika.

“Njengencenye yendlelalisu lekuBuyela Kusicalonchanti, liHhovisi leNdvuna Yemaphoyisa litawusungula luphiko lolukhetsekile lolutawubukana netidzakamiva kanye nebugebengu lobuhlobene nato neludlame kanye nekusabalala kwetibhamu emma ngweni wakitsi.”

Lamaphiko lamabili, kushito Mengameli, Luphiko Lwekulwa Nekubhema lwaseNingizimu Afrika kanye neLuphiko Lwekulawula Netibhamu Letingekho eMtsetfweni kanye Nebugebengu Lebunobudlova. Lamaphiko atakuba ngephasi kweLuphiko Lwekuphenya Ngebugebengu, lolwatiwa ngema-Hawks.